

दिनांक 23.06.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- राज्य रा घणखर हलकां मांय चोखी बिरखा-टोंक अर बूंदी जिलां मांय घणी भारी बिरखा रो रेड अलर्ट ।
- लोकसभा अध्यक्ष ओम बिरला कह्यो-प्राक्कलन समितियां शासन री दक्षता बधावण अर सरकारी खर्चा मांय कमी लावण मांय खास भूमिका निभाई ।
- प्रदेश मांय खाद्य सुरक्षा योजना रा तैत हाल ताई 45 लाख नुवा नाम जोड़ी ज्या- गिवअप अभियान रा तैत हाल ताई 22 लाख लोग मर्जी ऊं नाम पाछा लीना ।
- अंत्योदय संबल पखवाड़ो काल सरू व्हेला -मुख्यमंत्री भजनलाल शर्मा जरूरतमंद लोगां ऊं नाम मंडावण री अपील कीनी ।

.....

प्रदेश मांय 1 जून ऊं हाल ताई सामान्य ऊं 133 फीसदी बत्ती बिरखा व्ही है । मौसम विभाग आज 27 जिलां मांय बरसात रा आसार जताया है । बूंदी अर टोंक जिलां सारू घणी जोरदार बारिश रो रेड अलर्ट, जदके भीलवाड़ा, चित्तौड़गढ़, दौसा, करौली, कोटा, सवाईमाधोपुर अर जयपुर जिलां मांय बादळां री गाज अर जोरदार बायरो बाजण सागे बरसात व्हेवण रो ऑरेंज अलर्ट जारी करी ज्यो है । अजमेर, बारां, भरतपुर अर धौलपुर समेत केई जिलां मांय ई बरसात रो येलो अलर्ट जारी करी ज्यो है । ई बीच राजधानी जयपुर, सीकर अर नागौर मांय आज संवारे चोखो मेह बरस्यो । चूरू जिला रा सरदारशहर मांय तेज अंधड़ सागे घणो पाणी बरस्यो । हनुमानगढ़, श्रीगंगानगर, सवाईमाधोपुर अर झुंझुनूं समेत केई जिलां मांय आखा दिन रिमझिम बरसात व्हेती रही । लारला चौबीस घंटा मांय सब ऊं बत्तो 10 सेंटीमीटर पाणी धौलपुर जिला रा बाड़ी मांय बरस्यो । म्हाणा खबरनवीस बतायो के तेज बारिश ऊं केई ठोड़ा पाणी भर ग्यो है ।

.....

बारां, टोंक, झालावाड, बूंदी, सिरौही, पाली अर राजसमंद मांय ई चोखी बिरखा व्ही। घणी बिरखा रे कारण बारां मांय पार्वती नदी रा टापू माथे कुछ लोग फंस ग्या। जाणकारी मिलता ई एसडीआरएफ री टीम मौके पूग र फंस्यो लोगां ने दूजी ठोड़ां पूगाया। हाडौती हलका मांय लारला चार दिन ऊं व्हे रही जोरदार बिरखा ऊं चंबल, कालीसिंध, परवन, पार्वती अर वां री सहायक नदियां मांय ई पाणी रो लेवल तेजी ऊं बध रह्यो है। चंबल नदी माथे बण्या तीन ई बंधां ऊं पाणी निकाळ्यो जा रह्यो है।

प्रदेश मांय लगातार व्हे रही बिरखा ऊं केई ठोड़ां नदी-नाळा उफणबा लाग्या है। बूंदी रा गुडा, जयपुर रा छापरवाड़ा, भीलवाड़ा रा मेजा अर दौसा रा मोरेल बंधा समेत केई नदी-नाळा मांय चोखो पाणी आ रह्यो है। जयपुर मांय 15 जून ऊं बाढ़ नियंत्रण कक्ष काम कर रह्या है। जयपुर नगर निगम ग्रेटर री महापौर डॉ. सौम्या गुर्जर आं केन्द्रां रो आज औचक दौरा कीनो। वे अहलकारां ने आपदा रा हालात मांय सावचेत रेहवण बाबत् कह्यो। महापौर आं केन्द्रां माथे रेत रा कट्टां समेत ज़रूरी साधनां री व्यवस्था करण रा हुकम ई दीना।

लोकसभा अध्यक्ष ओम बिरला कह्यो है के प्राक्कलन समितियां शासन री कार्यकुशलता बधावण अर प्रशासनिक सुधारां मांय खास काम कीनो है। वे आज मुंबई मांय संसद , राज्यां अर केन्द्र रा राज वाळा प्रदेशां रा विधान निकायां री प्राक्कलन समितियां रा राष्ट्रीय सम्मेलन मांय बोल रह्या हा। लोकसभा स्पीकर कह्यो के नुवी तकनीक काम ले र आं समितियां रा कामकाज ने और बेहतर बणायो जा सके है। दो दिन रा ई सम्मेलन रा उद्घाटन सत्र मांय लोकसभा अध्यक्ष कह्यो के आं समितियां कानी ऊं करी ज्यी जनता रा भला ऊं जुड़ी सिफारिशां मांय ऊं करीब 90 फीसदी लागू कर दीरीजी है। सम्मेलन मांय **‘प्रशासन में दक्षता और मितव्ययिता के लिए बजट अनुमानों की प्रभावी निगरानी और समीक्षा में प्राक्कलन समिति की भूमिका’** मुद्दा माथे विचार कर्यो जा रह्यो है।

देश मांय 25 जून 1975 ने लगायी ज्या आपातकाल ने याद करता थकां भारतीय जनता पार्टी री ओर ऊं 25 जून ने **संविधान हत्या दिवस** रा तौर ऊं मनायो जावेला। साल 1975 मांय वां री बगत री प्रधानमंत्री इंदिरा गांधी देश मांय आपातकाल लागू कर दीनो हो। आपातकाल लागू व्हेवण रा ई साल 50 बरस पूरा व्हे रह्या है। ओ दिन भारत रा इतिहास रो काळो अध्याय मान्यो जावे है। इण ने सियासी उठा-पटक अर जनता री आज़ादी ने दबावण वाळा दौर रा तौर ऊं याद कर्यो जावे है। संस्कृति मंत्रालय री ओर ऊं 25 जून ने स्मरणोत्सव मनावण रो कार्यक्रम है। सालभर चालण वाळा कार्यक्रमों रा तैत मशाल यात्रावां निकाळी जावेला अर प्रदर्शनी, संगोष्ठी अर नुक्कड़ नाटक राख्या जावेला। पाली जिला रा लोकतंत्र सेनानी गौतम यति बतायो के आपातकाल रे दौरान वे एक साल ऊं बत्ता बगत ताई कैदखाना मांय रह्या। श्री यति कह्यो के लोकतंत्र री मज़बूती सारु आमजन मांय संविधान री जाणकारी व्हेवणी ज़रूरी है।

कालीसिंध थर्मल पावर परियोजना री एक इकाई ने सालाना सार-संभाळ रे कारण आवता 45 दिन सारु बंद करी जा रही है। हालांकि वठे लाग्योडी दूजी इकाई ऊं 600 मेगावॉट बिजली बणती रेहवेला।

प्रदेश मांय खाद्य सुरक्षा योजना रा तैत हाल ताई 45 लाख नुवा नाम जोड़ी ज्या है, जद के गिवअप अभियान रा तैत 22 लाख लोग मर्जी ऊं वां रा नाम खाद्य सुरक्षा योजना ऊं हटा लीना है। खाद्य अर नागरिक आपूर्ति मंत्री सुमित गोदारा आज बालोतरा मांय आ जाणकारी दीनी। वे कह्यो के खाद्य सुरक्षा योजना रा तैत वंचित अर जरूरतमंद लोगों ने राशन मुहैया करावण रो काम कर्यो जा रह्यो है अर सक्षम लोग खुद ई योजना ऊं नाम हटवा रह्या है।

मुख्यमंत्री भजनलाल शर्मा जरूरतमंद लोगों ऊं अंत्योदय संबल पखवाड़ा रा तैत नाम मंडावण री अपील कीनी है। आज वां रा रेहवास माथे जनसुणवाई रे दौरान श्री शर्मा कह्यो के अंत्योदय संबल पखवाड़ा रे जरिए सुबीतां ऊं महरूम लोगों ने सरकार कानी ऊं चलायी जा रही जनता रा भला री योजनावां रो फायदो दिरायो जावेला। प्रदेशभर मांय काल ऊं पंडित दीनदयाल उपाध्याय अंत्योदय सम्बल पखवाड़ो मणायो जावेला। कैबिनेट मंत्री जोगाराम पटेल आज जोधपुर जिला री लूणी पंचायत समिति मांय ई पखवाड़ा री तैयारियां रो जायजो लीनो। ई मौके वे कह्यो के 9 जुलाई ताई चालण वाळा ई पखवाड़ा रे दौरान हर तहसील मांय रोजीना 2 ऊं 3 शिविर लगाया जावेला अर ई सागे ई हर ग्राम पंचायत मांय ई शिविर लगाया जावेला। समाज मांय सुबीतां रा लिहाज ऊं आखिरी ठोड़ रा लोगों ने सुबीता मुहैया करावण रा लक्ष्य सागे **गरीबी मुक्त गांव** योजना चलायी ज्यी है। ई रा पैला दौर रा तैत 5 हजार गांवां मांय गरीबी री लकीर ऊं नीचे जीवण वाळां ने गरीबी रेखा ऊं ऊंचा उठाया जावेला।

भारतीय जनसंघ रा संस्थापक डॉ. श्यामा प्रसाद मुखर्जी ने आज वां री बरसी रे मौके सिरधाभाव सागे याद कर्या जा रह्या है। ई मौके प्रधानमंत्री नरेंद्र मोदी सोशल मीडिया पोस्ट रे जरिये कह्यो के डॉ. मुखर्जी देश री अखंडता बणायी राखण सारु जबरदस्त हिम्मत रो दरसाव कीनो। भारतीय जनता पार्टी रा राष्ट्रीय अध्यक्ष जगत प्रकाश नड्डा ई डॉ. मुखर्जी रा योगदान ने याद करता थकां कह्यो के श्यामा प्रसाद मुखर्जी स्वतंत्रता सेनानी अर समाज सुधारक हा। डॉ. मुखर्जी रा बलिदान दिवस रे मौके जयपुर मांय राख्यी ज्या कार्यक्रम मांय मुख्यमंत्री भजनलाल शर्मा कह्यो के वे प्रखर राष्ट्रवादी विचारक हा। श्री शर्मा कह्यो के डॉ. मुखर्जी भारत रा एका अर देश ने सांस्कृतिक तौर ऊं ओजू जगावण सारु पूरी जिन्दगी लगा दीनी।

बांसवाड़ा, चूरु, पाली, डूंगरपुर, झुंझुनू अर श्रीगंगानगर समेत न्यारा-न्यारा जिलां मांय ई डॉ. श्यामा प्रसाद मुखर्जी ने सिरधाभाव सागे याद करी ज्या।

आज अंतर्राष्ट्रीय ओलम्पिक दिवस है। ओ दिन खेलां रो महत्त्व बतावण सागे भाईचारा रो संदेश ई देवे है। अंतर्राष्ट्रीय ओलम्पिक कमेटी 23 जून 1894 ने बणायी ज्यी ही। ई ऐतिहासिक दिन री याद मांय आखी दुनिया मांय ओलम्पिक दिवस मनायो जावे है। इण रो मकसद खेलां ने सगळा सारु आसाण बणावणो अर खेल मूल्यां ने जनता ताई पूगावणो है। ई साल इण रो मुद्दो **“बेहतर भविष्य के लिए साथ चले”** राख्यी ज्यो है। ई मौके आज आखी दुनिया मांय मैराथन, साइकिल रैली, फिटनेस इवेंट्स, शिक्षण संस्थावां मांय खेल-कूद री होड़ां अर खिलाड़ियां सारु वेबिनार अर वर्कशॉप रा आयोजन राख्या जा रह्या है। **खेल सगळां ने जोड़े है**, ई भावना सागे प्रदर्शनियां अर सांस्कृतिक कार्यक्रम ई राख्यी ज्या है।

प्रधानमंत्री नरेन्द्र मोदी आकाशवाणी ऊं 29 जून दीतवार ने प्रसारित कर्या जावण वाळा खास कार्यक्रम मन की बात मांय विचार बतावेला। आ ई रेडियो कार्यक्रम री 123वीं कड़ी व्हेला। आप ई ई सारू मुफ्त नम्बर **1800—11—7800** माथे 27 जून ताई राय भेज सको हो। ई रे अलावा नरेंद्र मोदी एप या माय जीओवी ओपन फोरम रे जरिए ई सुझाव भेज्या जा सके है।

.....